

閩侯縣志卷六十七

列傳四下

侯官

明

胡鼎字宗器洪武閒以諸生爲掾與諸吏不相能及憲府謀辟從事諸吏自言不如胡掾已從僉事孫某分司泉州孫貪殘無忌鼎進謹言不納上疏劾之孫竟得罪去諸長佐相謂曰是掾曾藏陽秋愼毋犯滿考遷光祿署丞鼎進止有度太子嘗遙見問爲何官目送久之

王善字師舜永樂辛卯進士授南京刑部主事明習法令善折獄有誣其受賕者成祖因入朝密使人檢其家惟得所賜鈔半錠帝歎異之陞行在刑部郎中宣德中擢雲南左參議麓川叛善進兵金齒值歲歉衆議和糴善曰和糴亦病民乃蠲僧寺徭役命出粟數萬石饑民賴之永寧土官南入與四川鹽井衛土官刺馬非爭地累年仇殺都督沐昂檄善理之皆帖

閩侯縣志

六七

列傳四下

服秩滿當入京威寧伯王越奏留參其軍居久之致仕卒

王良永樂乙未進士爲戶部主事帝知其名令督口外糧餉威聲大振經理其事者名位雖高人不畏服也後與主事劉良構怨相訟卒白其枉以老病致仕

高旭字時旭宣德癸丑進士授吏科給事中改兵科正統中遷江西提學僉事景泰初改提刑旭莅官平恕明慎決獄多所平反徽歛盜發力疾馳饒州授所司備禦疾劇卒曾孫應禎字貞甫正德辛巳進士知湘潭縣流寇數百塹山爲砦剽劫村落應禎以計招其渠魁使入縣習禮因寒更製犄衣鞞狗皮帽以示溫異伺稍懈陰布健兒視鞞帽盡殲之洗其黨火其寨邑以無事作竹泉書院暇則躬自課士

黃鎬字叔高正統乙丑進士試事都察院未半載以明習法律授御史十四年巡按貴州時靖遠伯王驥征麓川叛蠻無功鎬轉戰而前至鎮遠會驥等倉卒退師賊襲其後進逼平越鎬軍適至與賊遇夜跳入城賊以長



圍迫之議者欲棄城走鎬曰無平越無貴州激厲諸將固守密置疏竹筒中募土人閒行乞援於朝景帝命保定伯梁瑋等合川湖軍往援圍始解被圍九月掘草根煮弩鎧為食卒全城鎬功為多已復留按先後疏凡五十上皆採納景泰三年使還值湖湘蠻反命大臣戡定卽以鎬參其軍湖湘平遷廣東按察司僉事改浙江成化初以大臣會薦擢廣東左參政高雷廉三郡負海多盜皆討平之由是朝議以鎬可大用進浙江按察使再遷廣西左布政以右副都御史總督南京糧儲兼理屯田歷吏部左右侍郎十六年拜南京戶部尙書十九年致仕賜璽書馳傳歸道卒贈太子少保謚襄敏子澍字天澤弘治壬子舉順天鄉試授順天府通判龍山灣廠司上供炭薪民為豪右漁放往往重輸破家澍立法召商畢納償之財無妄費後遵行為令畿甸多勦戚貂璫澍一切裁以法慶雲侯侵奪民田數千畝澍履畝勘還之諸豪因劾澍欺皇親帝曰澍小臣能抗皇親可嘉也擢治中正德初出守姚安府鐵索箐通寇逼郡城澍召士兵設策禽賊

閩侯縣志

六七

列傳四下

二

數百人其地遂靖建棟川書院課士士樂歸之尋致仕歸

王佐字彥弼景泰辛未進士授刑部主事遷員外郎郎中在刑曹十六年凡訊鞫問律何如不自為輕重有指揮當論死獄未上伺佐暮歸投金一囊逸去遣人踵之不及明旦急白尙書移他曹有富室被誣罹重辟佐辨其免釋之其人來謝弗見也遷廣東左參政分守嶺東道有平賊功歲祿振貸全活甚眾孫希旦曷希旦字維周正德癸酉舉人歷官禮部祠祭郎中御史楊瞻等請以薛瑄從祀文廟下部議霍韜徐階鄒守益皆以為宜獨郭希顏不可希旦以為宜如韜等議論遂定以憂歸環堵一室至不能舉火處之漠然曷字文晦嘉靖壬午舉人授海門教諭愷悌樂善士樂親之擢國子博士遷監丞轉戶部主事俸入悉以給宗親貧乏者妻子不免於饑寒其卒也自同僚至輿隸皆哭失聲

林珙字廷珍父某字質齋善畫珙第天順甲申進士侍親十有七年親沒始仕除南京刑部主事歷員外郎遷浙江僉事弘治三年處州賊吳大兒



嘯聚剽掠旁及閩中政和浦城諸縣勅浙江鎮巡等官勦捕以事屬玳玳發諸屬縣兵分據要害以精銳千二百人攻破其巢賊奔松溪之渠口據高隘復感之獲渠魁戮數百人餘走慶元竄景甯又追擒三百餘人支黨散匿山谷玳玳出示諭降兩省以安時又有遂昌黃巖賊聚眾至萬人未發聞玳玳破賊皆洵懼玳玳預設形勢疑之皆自解散遷雲南副使雲南民夷雜處玳玳曰地既入華當以華治爲別名分重禮教創設分司以便官督造永安橋以便民効都司之冒功陞賞者數人皆謫戍於是上下翕然歸重撫按交章論薦以年老乞休歸弟玳玳玳玳字廷珪讀書過目輒記爲文章下筆立就天順壬午舉于鄉塘以成化乙酉舉同赴會試至鵞湖驛玳玳得疾塘亟扶以歸甫及門而卒塘字廷玉登成化辛丑進士授行人遷御史巡按雲南勦鐵索箐寇滅之黔國公掾吏張聰盜柄通賄事敗塘治之論戍聰有安乃者土官子土官坐事死獄中通把利其田言乃謀叛又普顯者土官弟其嫂氏虞欲爭襲証以通黑腳夷三千入寇皆繫獄十餘年被

閩侯縣志

六七

列傳四下

三

累死者百計土人懼其出蜚語謹叟無敢白者塘駭曰安乃叛從者何人寇何鄉黑腳夷至三千當時有飛報征調事豈得自默遂不能難乃顯得安置四川玳玳孫璧字茂東嘉靖己丑進士官廣東僉事松茂番寇邊璧上言松茂曩爲大鎮都御史寇深侍郎羅綺嘗假使官專制其地故有功令惟設兩參將以副使居中調度事權旣輕臨敵又稟令制府千里請戰謀洩機緩未有能獲利者宜別置重臣彈壓或卽命巡撫都御史張瓚兼領專其責成從之父文繼與嚴嵩同年璧體父志終不附嵩官二十餘年止五品歸無一椽居於宗祠

林廷玉字粹夫父芝字應瑞景泰四年舉人官信宜訓導教必兼行藝遷韓府紀善多所匡正尋乞致仕遠不能歸乃占籍平涼成化癸卯領陝西鄉試第一明年成進士乞省親歸二十一年還朝命襄楚憲王妃葬復奉使廣東還授吏科給事中弘治改元廷玉上疏略言天地交而後萬物生上下交而後德業成聖帝明王君臣之間分雖尊嚴情實浹洽故經有朝



見禮以嚴其分又有燕見禮以通其情願陛下通君臣之情出御文華宣  
召大臣虛心延訪凡古今政治之詳軍民利病之實詢謀僉同斷而行之  
裨益非小且萬幾之繁章疏千言不能遽悉得面諭則數語殆盡其蘊又  
上籌邊翊治十事曰明賞罰以振軍旅禁暴掠以安黎庶革宿弊以清吏  
治預處置以成人材表忠良以垂世教慎師儒以敦化本肅禮儀以廣畏  
敬普惠澤以恤困窮舉遺才以昭激勸究元惡以示鑒戒其論究元惡言  
奸僧繼曉罪惡貫盈先年雖已發回爲民然盜竊賞賚家貲尙巨萬日擁  
美姬以自娛漏網故鄉優游自在又奸人李孜省道士鄧常恩趙玉芝姦  
黨煽焰傾動一時陛下洞燭其姦攷省下獄玉芝謫戍宜矣而其父母墳  
塋輝煌如故非所以昭典法帝納其言遣錦衣衛捕繼曉送京師伏誅削  
玉芝等誥敕六年轉左給事中上保治十箴曰務學勤政畏天愛民親賢  
遠佞容言納諫公賞罰抑奢侈重名器斥異端各繫箴於後十一年遷都  
給中遇彈劾必正色曰此非報恩復讎之地人材難得毋以曖昧細故傷

閩侯縣志

六七

列傳四下

四

人十二年會試給事中華景劾考官程敏政以表策題賄鬻於江陰徐經  
蘇州唐寅廷玉復攻敏政可疑者六事廷玉景與敏政俱下獄按問敏政  
致仕去經寅皆斥譴廷玉亦謫海州判官海州地貧瘠鹽場私徒出入廷  
玉授方略一鼓禽強徒數千肩負易米者置不問越三年稍遷茶陵知州  
建洙江書院暇則深衣幅巾集生儒講正學十八年陞江西僉事武宗卽  
位遷廣東提學副使署司事民崔鎮及其義子夜爲人殺遺匿名書云阮  
英殺英不勝拷掠誣服廷玉理其獄得眞殺人者英得釋義官黎民阜一  
妻二妾生五子不得於繼母曹氏析而村居數月出門旬日不返其妻  
遺小僮往叩於曹曹匿童率人執妻妾謂其殺夫而利其有官信之論三  
婦死垂十六年弗決廷玉讞之曰三婦生五男何無一人愛其夫而協謀  
殺之且曹安知民阜已死遽縛三婦是三婦未知民阜死曹先知之矣人  
命至重無尸可按驗豈可輒疑竟從辨釋七年擢右通政其冬以右僉都  
御史巡撫保定諸府勢宦貴戚聯絡畿輔閒類多不檢廷玉一繩以法咸



歛戢劫賊十百為羣廷玉誦知賊為安插降人嚴捕之欲治其所轄指揮  
罪賊盡颺去又劾太僕寺張鑑貪贖帝命執鑑下錦衣獄而調廷玉掌南  
京都察院事御史董建中遂劾其拗執偏刻乃乞休歸正德十三年夏閩  
卒進貴葉元保等怨布政使伍符裁減月糧遂作亂閉城門內外岌岌廷  
玉與高文達造其壘諭以朝廷威德羣黨解散八月又亂復與文達撫定  
之嘉靖末有司上其功詔立祠與文達並祀

李景元初名孟以字行又字一之正德甲戌成進士授刑部主事武宗將  
南巡景元與同官陸倬等抗疏極諫忤旨責跪五日廷杖奪俸既而遷員  
外郎宸濠反逮繫數千人真偽莫可辨尚書薦景元才擢郎中訊囚多所  
平反嘉靖改元以忠義被獎初武學生朱大周許奏大臣不法逐之去位  
久而論定欲治大周以朋黨律且及搢紳十餘人景元曰黨事不可興也  
止擬謫戍餘俱不問識者韙之在刑部八年出為南寧知府鄰郡方用兵  
給軍餉至數萬處之裕如有富室殺人賄脫誣平民抵死景元曰死者免  
閩侯縣志 六七 列傳四下

五

矣復以平民償之是重殺人也執不可當道者主前議甚堅忿景元持其  
短遂註以疾會以母憂歸遂不出

林春澤字德敷伯祖堅字叔玉成化乙酉舉於鄉官廬陵訓導校應天試  
舟至鎮江有同鄉包生者奉千金為壽乞無見抑堅卻之祖塋字叔敏武  
勇過人鄧茂七之亂集鄉社千餘比什伍朝夕巡邏賊不敢窺境父鐸字  
汝和喜任卹鄉里春澤正德甲戌進士授戶部主事權臨清關屬武宗南  
巡諫者皆廷杖罰跪午門春澤抗疏千餘言救之汪彬扈從擅威福春澤  
持正不阿彬為氣奪坐事謫寧州州同累遷肇慶府同知島寇掠高州檄  
攝知府事春澤習知兵之害民悉罷遣之代以土著部署方略寇次第就  
擒擢南京刑部郎中出為程番知府擇耆德文學士分布夷寨為童子師  
卧龍暨通州塞屢失地春澤與安順宣慰司李指揮協謀平復功未上為  
忌者所中歸蚤歲有詩名與鄭善夫方豪何景明相唱和壽百歲時有司  
為立人瑞坊



張經字廷彝父海字德涵幼孤母蔡氏攜養外家蔡氏絕遂襲其姓海好觀書史過目了大義經狀魁偉有文武才正德丁丑第進士乃復張姓除嘉興知縣嘉靖四年召爲吏科給事中厯戶科都給事中彈劾不避權貴寧夏總兵官种放行賂京師偵事者獲其籍則兵部尚書金獻民名在焉經率同官高世魁劾之獻民引疾去潘墳巡撫河南匿災不報爲經所劾詔罷墳七年正月經請罷遣廠衛官校言此屬假勢作威淫刑贖貨譬則虎狼蛇虺遇者無不被其毒噬至於地方之騷擾驛遞之需求又不可勝言帝納之十六年旋進兵部左侍郎總督兩廣軍務斷籐峽賊侯公丁據弩灘爲亂經與御史鄒堯臣等定計以軍事屬副使翁萬達誘執公丁參議田汝成請乘勢進討於是分道抵賊巢夾擊賊奔林峒而東斬首千三百餘級平南縣有小田羅應古陶思古諸徭亦據險不靖移師攻之俘其眾招降者二千九百有奇捷聞進經左侍郎加秩一級先是安南莫登庸篡位廷臣僉言討之經上言安南進兵之道有六當用三十萬一歲之餉

閩侯縣志

六七

列傳四下

六

當用百六十萬造舟車市馬制器犒軍諸費又須七十餘萬况我調大眾涉炎海與彼勞逸殊勢不可不審處也尋與毛伯温定計撫定之再進右都御史平思恩九土司及進兵部尚書鎮守如故副使張瑤等討馬平徭屢敗帝罪瑤而宥經給事中周怡劾經經乞罪不允以憂歸服闋起南京戶部尚書改兵部三十三年朝議以倭寇猖獗設總督大臣命經解部總督江南江北浙江山東福建湖廣諸軍便宜行事時廷議欲徵狼土兵勦寇以經總督兩廣有威惠爲狼土兵所載故有是命經亦慷慨自許然諸將連戰不利望實稍損朝命逮應天巡撫屠大山黜爲民責經久戰無功改經右都御史兼兵部右侍郎代大山專辦賊倭二萬餘據柘林川沙窪其黨方踵至經日選將練兵爲擣巢計以江浙山東兵屢敗欲待狼兵至用之三十四年正月賊犯乍浦海寧陷崇德轉掠杭西江南人苦倭久口語籍籍罪經玩寇帝怒切責剋期勦賊工部侍郎趙文華督師新至意甚銳頤指經而經以大臣自重出其上文華恚甚會寇犯浙江文華督戰益



急經曰賊狡且眾待永保兵至夾攻庶萬全文華再三言經守便宜不聽  
文華益恚遂疏劾經養廢財帝怒卽下詔逮經方文華拜疏時永保兵  
已至其日卽有石塘灣之捷五月朔倭數千人水陸奄至突犯嘉興經領  
浙兵擣賊巢於松江永保兵亦破倭川沙窪倭出海東遁去已聞倭犯嘉  
興經乃分遣參將盧鏜督保靖兵總兵俞大猷督永順兵由泖湖趨平望  
參將陽克寬引舟師由中路擊之合戰於王江涇斬賊首一千九百餘級  
焚溺死者無算捷聞給事中李用敬閻望雲言王師大捷倭氣奪不宜易  
帥帝大怒曰經欺誑不忠聞文華劾方一戰用敬等黨奸杖五十斤爲民  
已而帝疑以問嚴嵩嵩言徐階李本江浙人皆言經養寇不戰文華宗憲  
合謀進勦經冒以爲功帝深入其言經既至備言進兵始末且言任總督  
半載前後俘斬五千乞賜原有帝終不納適刑部郎中何鼇論經死奏上  
遂與巡撫李天寵俱斬都市舉朝冤之三十四年十月也隆慶初經孫懋  
爵詣闕訟冤乃復故官賜諡襄愍

閩侯縣志

六七

列傳四下

七

楊叔器字德周正德辛巳進士嘉靖初疏請除錦衣諸冗員授南京御史  
時彗星見天雨血疏陳天變之由及修省六事曰放宮人裁冗官薄稅斂  
謹聽訟輕權課寬匠役前後諫章累數十上於君德官方內地邊防皆悉  
心論列並見嘉納會京察奏罷要職二十餘人爲權貴所忌南京錦衣指  
揮張敬無嗣異族張承祖賄託謀襲叔器曰黃金可以鬻國法異姓可以  
蔭官爵耶尋罷歸

林應亮字熙載春澤子嘉靖壬辰成進士除穎上知縣調秀水廉聲大著  
有道士寄居僧寺被殺前令委罪主僧僧既誣服應亮疑之跡得殺者主  
名乃釋僧一郡驚爲神明暇則進諸生闡釋經義十六年擢戶部主事再  
遷精膳郎中出知常德府常德多峒蠻居民凋敝而榮府官校又挾勢齟  
齟人號難治應亮核兵餉肅郵傳縛官校不法者置諸理榮王悔謝諸巨  
璫屏息搖手戒母犯二十四年遷廣西副使備兵府江諸土司爭爲盡力  
猺獞望風斂迹累遷廣東按察使嘗繩勢家奴以謝諸生李清遠四會寇



轉廣西左右布政復以原官改北督倉場嚴嵩為禮部尚書故嘗知應亮及為首輔應亮無殊禮嵩及子世蕃恚甚會廷議遣大臣赴薊州督餉練兵嵩欲用戶部趙貞吉應亮曰督餉者督京運乎民運乎若二運已有職掌添官徒增擾耳兵之不練其過不在是即戶侍出何益嵩怫然罷會令都給事中張益劾應亮調之南京旋晉戶部右侍郎以父老力請告歸吳時昭字以德嘉靖甲午舉人知瓊山縣五指黎曰丑曰罵者恣剽掠邑主簿往撫中伏矢斃上官以屬時昭時昭單車往諭皆折矢解甲有唐秩者恃父為京卿殺人監司受苞苴圖寢其獄秩挾千金夜詣時昭時昭叱出之遂坐大辟會世宗詔求科書元祕秩以所藏獻脫桎梏為太常丞負緣得幸時昭罷歸

林廷琛字世獻嘉靖乙未進士授戶部主事四奉命督稅大著廉名朝中為之語曰林主事何稜稜官所至一條冰厯郎中監崇文門稅有倚勢觸禁者廷琛執法不顧會朝正旦後期坐謫鎮江通判有欲為廷琛私營者

### 閩侯縣志

六七 列傳四下

八

廷琛峻止之遂棄官歸馬森嘗語人曰余海內知交稱廉介者汶上吳嶽南雄譚太初吾閩則鄭世威林廷琛其最矣

舒汀字紹安嘉靖乙未進士授行人選御史奉使兩淮巡按南畿鋤擊奸豪風裁赫著人稱為真御史二十一年四月與蘇松巡撫議請割華亭上海設青浦縣從之繼按浙江勢家有橫恣者皆自斂戢使還會有邊警尚書毛伯溫置酒會客汀劾伯溫不憂國事帝怒罷伯溫當事者忌之出為雲南副使值大計又謫州判而汀已卒

王應鍾字懋復嘉靖辛丑進士選庶吉士授監察御史巡鹽長蘆疏論東廠太監馬廣貪虐詔切責廣一時中貴人斂迹巡按順天糾郡縣不職者二十餘人錦衣衛指奸細誣人應鍾白其冤守備昌平太監王敏賸削軍士應鍾數其罪帝為遂敏河套事起應鍾以與前議逮詔獄錦衣衛修前愆幾斃杖下尋得釋按浙江所至墨吏解綬去入掌河南道會大計吏時嚴嵩柄國欲芘其私人應鍾弗許出為河南提學副使宗室橫暴有凌諸



生者繩以法轉山東參政為嵩所中罷歸

魏體明字用晦嘉靖乙丑進士除知吳縣以最擢給事中歷兵刑工三科條上謹天戒慎刑獄與戎政防守所宜急者又陳時政十二事皆見嘉納時趙炳政議更營制體明疏謂輕變兵制非祖宗法乃罷內豎李進殺人都市劾之正法復糾恭順侯違命罪勲臣殷栗出為江西按察司副使備兵九江鄱陽彭蠡閒多盜體明增戈船遊徼勒兵守要害盜渠率就縛轉山東參政分守青萊調停河運進雲南按察使測莽打喇必叛請勿受貢以絕其奸就進右布政轉四川左布政凡所供採木文錦宮扇諸物費以數萬計區畫得宜民不知疲

翁正春字兆震父興賢為諸生精於易再中鄉試副榜除建陽訓導有婺婦子為邑令箠且死興賢察其冤力白得解又請縣令蠲力役定埠直以蘇邑困遷延平府教授復移金山衛終浙江運判正春萬曆閒為龍溪教諭壬辰成進士擢第一人授修撰奉使冊封周藩歷中允庶子擢少詹事

閩侯縣志

六七

列傳四下

九

兼侍讀學士三十八年拜禮部左侍郎是時帝高拱在內大僚少所進用正春以貳長且直講闡十一月朔日食上言畧云陛下自萬曆二十年後財貨日斂聚人材日剝落旨意日留中至今已極矣一切請補大僚推考選起廢棄皆不省而橫征逮繫者不止天下不見陽和舒育之氣而冰凝之象獨堅夫日之食與更祇在一時陛下之寢與行亦惟在一念誠鑒於此而翻然轉移則天變可挽矣不報明年秋萬壽節獻八箴曰清君心遵祖訓振國紀信臣僚寶賢才謹財用卹民命重邊防帝雖不能用然心善之吉王翊鑾請分支子常源為郡王正春言翊鑾之封在宗藩要例已定之後其支庶宜止本爵乃授鎮國將軍王貴妃薨久不卜葬正春以為言命偕中官往擇地得吉中官難以煩費正春勃然曰貴妃誕育元良他日國母也奈何以天下儉乎奏上報可代王二子爭立朝議以鼎渭長宜立下禮部正春日庶均立長宜也然訟父得立不順請以爵予鼎渭子而以前所立次子鼎蔘為將軍則父子兄弟之倫皆盡咸以為允琉球中山王



入貢正春言中山已入於倭今使臣多倭人貢物多倭器絕之使其中山土物則詔福建撫臣量留毋俾入朝帝是之是時皇太子輟講已九年正春上疏曰東宮輟講已久控陳愈切概置不問意臨御日久靜攝多年視天下事無一足為吾急者遂并天下大本之地子孫之計而亦緩之乎其何以對列聖慰四海臣民且天下亦多事矣元日風二日火宮府釜鬻之刑朝紳水火之象閭閻困敝內外交訐陛下聰明天縱奈何於目前大事遲疑如此不報四十年進士鄒之麟分校鄉試私舉子童學賢為御史馬孟禎所發正春議黜學賢謫之麟而不及主考官給事中趙興邦元詩教因劾正春徇私正春求去不許頃之言官發湯賓尹韓敬科場事正春坐敬不謹敬黨大恨詩教復劾正春正春疏辯益求去帝雖慰留然自是不安其位四十一年四月改吏部掌詹事府以待養歸天啓元年起禮部尚書協理詹事府事上疏論魏忠賢有旨切責明年御史袁鯨復論正春呈身門戶為東林巨魁正春再疏乞歸帝以正春嘗為皇祖講官特加太子

閩侯縣志

六七

列傳四下

十

少保賜敕馳傳蓋異數也未幾卒崇禎初謚文簡

曹學佺字能始幼力學好古萬曆乙未會試策問車戰對曰臣南人也不諳車戰請以舟戰論因詳陳舟戰法考官張位奇之第進士授戶部主事既位被逐踉蹌出通州門生故吏莫敢往視者學佺獨追送舟次為庀糗糧甚悉而臺省以銜位遂遷怒學佺摘丁酉所取卷為險怪不經中察典調南京添註大理寺正居冗散七年益肆力於學累遷南京戶部郎中四川右參政值建南不靖調兵防守而轉餉於川西南過大渡河輒遇瘴斃學佺乃假便宜以運費徑解守道令自買運蜀人得免饋餉之苦歲大饑設廠煮粥繪圖上請得發帑金三百萬以賑蜀有行坐二稅行稅取商坐稅取民歲饑民流亡坐稅無所出乃以歷年行稅贏羨萬餘金抵本年坐稅民免追比而貪有司皆側目蜀邸燬於火估費至七十萬金學佺援宗藩條例卻之蜀路險絕學佺署驛傳時發兩川各千金并搜括羨餘修道途輿梁三十九年進按察使又中察典議調歸構石倉園賓明翕集天啓



二年起廣西右參議桂林宗室素橫學佺獨執法遇事屬有司治之又爲反覆開譬宗室肅然全灌興安諸州縣糧艘集東江親詣驛兌支糧戶旣省入倉費軍且得實惠勒石爲令錢局患侵漁歷二年僅獲利千餘金學佺立程度清覈年獲利五千私鑄奸徒或緣宗室爲窟穴不可問學佺嚴捕不少貸搖撞不通言語有司往往魚肉之乃嚴爲約戢并改營鎮於他所禁入峒騷擾會平樂大饑罷市奸民及驕軍洶洶起學佺以嚴靜鎮之仍便宜假餉銀給票買運糧艘四集軍民乃安初挺擊獄興劉廷元輩主瘋顛學佺著野史紀略直書本末六年秋學佺遷陝西副使未行而廷元附魏忠賢大幸乃劾學佺私撰國史淆亂是非遂削籍燬所鏤板勒閒住時大吏揣學佺必得重禍羈七十日不聽歸旣而探忠賢無意殺之乃得釋還崇禎初起廣西副使力辭不就會海寇熾學佺移書當事請於梅花雙龜屯兵扼要建煙堡編居民自相守又條陳機宜九事略言驅逐妖術勿亂軍心責有司使時閱城堡嚴會哨令首尾聯絡審要害遠近各爲分

閩侯縣志

六七

列傳四下

七

守又稽劾海船不使通賊然後習車戰載石礮伏於險害以防之飭衛所與官兵一體訓練而終以搜求人才俾資緩急皆舉行賊以是遠遁又與董應舉議塞龍腰往來之路毀平臺淫祠創橋城北五十里之潘渡又濬河開湖建洪山萬安桐口三橋十七年聞京師陷投池中爲家人救不死踰年唐王至闈學佺進覲授太常卿時庶務草創皆學佺與黃道周參決之尋遷禮部侍郎兼侍講學士纂修崇禎實錄進尙書加太子太保又踰年松江夏允彝等起事戶工二部尙書張肯堂請王出關趣浙東而已以舟師由海道抵吳淞招諸軍學佺力贊謂徼天之幸在此一舉乃損餉一萬以速其行會爲鄭芝龍所阻其年八月唐王敗於汀州學佺沐浴整衣冠縊於西峯里第時七十有四歲清予諡忠節

曾熙丙字用晦萬曆丁酉舉人惠安教諭遷知新會縣強幹有智慮有羣盜聚黨方謀行劫熙丙先調知遣役遽入其舍禽之自是盜賊屏跡擢南京御史天啓初上疏陳十事其言肅紀綱養廉恥清銓政定人品儲邊材



尤懇摯又力疏鄒元標董應舉輩當大用時奄人擅權毒流遠邇熙丙守正不阿奸人側目然莫能加害所上前後疏皆留中遂以母老乞終養屢薦不起崇禎甲申流寇陷京師熙丙聞報哭不食者累日月餘卒

陳一元字泰始父志字希尹以歲貢生授將樂訓導卻贄金勤教化一元萬曆辛丑進士知四會縣構仕學軒以清慎勤自矢善訓士文教一新請學使廣學額建橋修堤輕徭革耗上官嘉其績調南海遇水災巡行振卹不遺餘力歲額貢官布多積逋奉詔新舊並徵民情囂然一元多方償補事遂定再調嘉定擢御史巡按江西值歲祲留稅發賑檄所司告糴吳楚全活無算給事中劉文炳劾兩淮巡鹽御史徐縉芳因言御史劉策入葉向高幕干票擬一元向高姻親操權利初一元論銓政嘗譏切向高見文炳疏憤甚遂揭文炳陰事且曰向高行矣今秉政者方從哲文炳鄉人奴顏婢膝任彼好爲之帝不省一元卽移疾去天啓初起尙寶司少卿歷應天府丞署府尹事值荒歉兵民枵腹將亂一元權宜發粟以賑旣而御史

閩侯縣志

六七

列傳四下

十一

余文縉劾向高復及一元遂落職崇禎初復官溫體仁柄國惡其附東林而以爲已門生也引嫌不召卒於家孫亨字蓮石崇禎庚辰進士年二十出爲松江知府福王時與廣西巡撫方震孺給事中李維樾僉都御史李光泰先後措餉募兵入衛陞蘇松常鎮督糧副使南京亡退居福州西關外柳橋

邵捷春字肇復萬曆己未進士累遷稽勳郎中崇禎二年出爲四川右參政分守川南撫定天全六番高陽二氏遷浙江按察使坐察典罷久之起四川副使以十年秋抵成都時秦賊入蜀巡撫王維章總兵官侯良柱悉眾北拒城中惟屯田軍及蜀府護衛軍人情恇懼捷春啓門納鄉民避賊者中尉奉鑽勾賊抵城下捷春與御史陳廷謨禽擊奉鑽而募市人起廢將固守賊去新撫傅宗龍命總兵羅尚文擊賊以捷春監其軍明年尙文大破賊過天星等進捷春右參政仍監軍十二年五月宗龍入掌中樞卽擢捷春右僉都御史代其任時張獻忠羅汝才叛謀入秦秦兵扼之興安



乃犯興山及蜀太平遂窺大寧捷春遣副將王之綸方國安分道扼之之綸敗績國安連破賊賊遂去蜀分擾秦楚十月朔楊嗣昌誓師襄陽檄蜀軍受節制嗣昌以楚地廣衍難制賊驅之入蜀蜀險阻不得逞蹙之可獲全勝又慮蜀重兵扼險賊將還毒楚調蜀精銳萬餘隸麾下自是蜀兵益弱且專受禍捷春爭之不能得於是汝才及惠登相由興山遠安犯大寧大昌獻忠亦猝至太平捷春計禽其帥張獻武等三十六人斬獲無算明年二月左良玉又大破獻忠瑪瑙山獻忠走故道西從汝才時汝才在寧昌阻江爲諸將劉貢秦良玉秦翼明楊茂選等所拒不得渡會獻忠來遂與貢等戰不利二賊乃渡江其別部營紅茨崖青平砦歸巫閉大震嗣昌乃上夷陵而檄捷春扼夔門棄大寧大昌三十二隘口噉賊捷春曰棄隘口不守是延賊入戶也乃遣茂選及覃恩岱出關分守二將不相得恩岱潛殺茂選賊遂突隘夜斬夔關長驅而入新寧大竹皆陷遂越巴霧河陷開縣捷春聞變檄總兵鄭嘉棟等以楚兵自夔州出雲陽邀其前監軍萬元吉督副將賀人龍等將秦師間道疾走米山截之汝才乃與小秦王混世王東奔獨登相逼開縣而西人龍及李國奇又西追之賊鋒屢挫遁還興山會嗣昌下招降令小秦王混世王皆降惟汝才逸去嗣昌見楚地無賊盡萃於蜀八月率師入蜀當是時捷春持弱卒二萬守重慶所倚秦良玉張令二軍乃移良玉自近而遣令守黃泥窪邵仲光守夜又巖三黃嶺等處萬元吉諫曰兵分則力弱何以能守捷春不聽九月獻忠突敗仲光軍十月陷大昌良玉令兩軍皆覆令中矢死良玉引歸捷春退守梁山賊勢益熾嗣昌遂收斬仲光上疏劾捷春時汝才復與獻忠合自開縣西走達州捷春退保綿州扼涪江賊復走西涪江師潰賊屠綿州捷春歸成都賊逼成都十一月逮捷春至京師下獄論死明年八月仰藥死

許豸字玉史崇禎辛未進士除戶部主事歷員外郎權許墅關以羨鏹築塘出爲浙江按察司僉事分守寧紹增築郡城殲海寇陳奇老等改提學副使有權璫鎮浙豸抗不爲禮士有迎璫者立撻之



鄭瑄字漢奉崇禎辛未進士由戶部郎知嘉興府政務簡靜興革順民濬城河築官塘民尤賴之郡人祀之以配前五賢守稱六賢祠累官應天巡撫開練河以通運道十六年春賊破蘄黃偽檄稱勤王兵犯池州寧國直窺南京瑄檄諸縣及水陸師結營要路堵勦而已與巡按御史鄭崑貞力持其閒事乃定唐王時入爲大理卿擢工部尙書

陳燕翼字仲謀崇禎甲戌進士知程鄉縣免供億省刑罰邑人稱之有楊千總者破賊得金以進燕翼卻之揭大吏以金儲公用十四年行取擢給事中明年李自成圍開封汴人獻計於巡按嚴雲京請決河以灌賊巡撫高名衡推官黃澍以爲然爲賊所覺方鑿朱家寨口賊先移營高阜驅民夫反決馬家口灌城城全沒名衡澍及副將陳永福棲於城樓事聞舉朝大震帝念諸臣死守孤城不復問決堤事名衡尋加兵部右侍郎燕翼上疏嚴劾之疏入帝以燕翼逞臆苛議令部議尙書鄭三俊疏救擬奪俸不允乃降二秩補翰林孔目歸後給事中辜朝薦言燕翼所論中州一案守閩侯縣志

六七

列傳四下

西

汴之勞與決河之罪原不相揜在皇上深憫之所以作勞臣之氣在言官正言之實以存萬世之公不報福王立南京燕翼上中興疏授吏科右給事中轉禮科左奉命册封琉球未行唐王稱號晉吏科都給事中閣臣黃道周言燕翼堪啓沃改編修累遷少詹事燕翼建言無虛日唐王敗與張利民同爲僧於雪峯又居連江山寺以疾卒

張利民字能因崇禎庚辰進士知桐城縣時流寇徧江北桐城當其衝旣至市廛蕩爲邱墟數百里無人跡城門晝閉者數月聞新令至始啓關胥役寥寥士民強半避居遁賊無所責寇近者七八十里遠者二三百里參將陳某監紀通判邵某統兵無紀律悍卒播虐甚於寇利民激以忠義乃漸戢會張獻忠來攻利民集將士執所佩刀殺雞盟曰諸公有二心者視此又折矢誓曰利民今日藉諸公力堅守有功而不以上聞者視此眾咸感泣遂懸賞編伍定戰守程度民始有固志副將廖應登爲賊所禽賊挾以攻城木牛雲梯畢具時應登親黨標兵多在城利民極力防禦造內城



數十丈濬深溝晝夜環守經年糧告匱會總兵黃得功劉良佐合兵擊賊於鮑家嶺賊敗走湖廣城以全而援兵赴湖廣者又旁午於邑城內安插孫羅營兵三千禍不減賊利民委曲交歡兵民乃安方寇之殷利民鎖宅門令守者列炬以待曰賊至卽舉火賊退令追正供利民上牘懇豁詞氣愴切督撫惻然官三年治行推天下第一甲申國變福王立南京徵入朝授戶科給事中未幾南都失守唐王入閩稱號復授兵科右給事中兼刑工二科召對利民條陳守禦策轉禮科左給事中明年進都給事中兼吏科左尋遷大常寺少卿八月唐王敗於汀州利民祝髮自稱田中和尙又明年魯王至閩以左遷都御史召不赴數年卒

附懷安縣

洪順字遵道永樂甲申進士選庶吉士久之授刑部主事有李將軍者詐取囚金誣吏張緣受之同列皆欲坐緣順執不可竟置李於法尋以事左遷行人預修五經四書性理大全諸書擢山東僉事時山東遭唐賽兒之亂順剗弊理冤撫循凋瘵惟恐不及青州有趙訓導年老無僕妾諸生爲娶一婦時酬詈趙諸生張剛惡婦無禮殺之而逸婦家訟趙獄已具順獨心疑詢諸生中有遠出者乎僉曰惟張剛三月不至齋舍攝訊之剛自伏曰公神人也吾輩爲娶此婦以事吾師而背戾若此師老無死所矣是以殺之今師存剛死固所甘心順曰剛雖不先自首顧其初心甚直爲請於朝釋趙并宥剛死尋遷按察使命下而卒

閩侯縣志

六七

列傳四下

五

林文秩字禮亨永樂乙未與弟文結同第進士改庶吉士拜監察御史有直聲從征高煦還巡按南畿風裁凜然詔從民請復留一年宣德末擢山西副使進按察使有告平陽王文簡妖言惑眾者連及三百餘家文秩力爲辨釋活幾二千人後致仕卒文結字嘉亨授王府審理改岳州通判爲政簡約誠於撫字嘗爲雲南考試官有腰黃金數千兩求登薦書者文結卻之

洪英字實夫父奐字子美工詩善書被薦以曠眊辭英永樂乙未會試考



官翰林院修撰梁潛潛初折卷得第一名爲陳循其鄉人也避嫌改第二而擢林文秸既又以秸字難識定英爲第一入翰林爲庶吉士歷文選考功主事進郎中用禮部尙書胡濙薦擢山東左布政使以仁恕爲治越三載就遷左副都御史巡撫其地賜璽書褒美景泰初督城役臨清時黃河橫溢臨清以南運道艱阻敕英與河南巡撫都御史王暹協治三年五月河流漸微沙灣隄成六月大雨夾旬復決沙灣北岸清河訓導唐學成上言地卑隄薄黃河勢大故隄完復決臨清至沙灣十二閘其勢甚陡請於臨清以南濬月河通舟直抵沙灣不復由閘則水勢緩而漕運通矣帝卽命學成與英相度其年八月以右都御史鎮守浙江詔考察大小吏去留之一僉事被黜怨英誣奏私其鄉人且加謗毀詔下獄尋釋致仕歸孫暉字繼明弘治辛酉舉人官剡城知縣精禮經多所教授曾孫世文字國華嘉靖戊戌進士由戶部郎擢湖廣參議有平徭功轉浙江副使值倭警克戢暴掠改山東左參議歲荒廣振貸以母老乞終養其弟世遷嘉靖丙午

閩侯縣志

六七

列傳四下

六

鄉試第一官南京大理評事

嚴烜字熙叔永樂乙未成進士拜御史按山東京畿四川河南皆有聲遷浙江僉事處州徐子舉作亂連坐者五十餘人烜悉散遣復業侍郎成均奉詔考察庶僚有毀之者遽送吏部改職烜乞典學校以便養除金華教授卒烜居官三十餘年田廬無所增益

鄭建字宏中幼從洪英學英器之宣德庚戌成進士選庶吉士帝御文華殿召試諸葛亮可與興禮樂論擢第一賚鈔百錠未幾以言忤當道出爲南雄通判郡民避徭役多逃竄建徧歷屬邑招徠之免逋負不數月民悉歸毋憂服闋謁選值閩浙之交民盜銀礦有與軍拒者帝命處州專設通判莅之吏部推擇以授建旣至諭民禍福首平其力役民遂以安銀課亦辦閩寇鄧茂七掠浙境建分守龍泉偕其子黼擐甲胄率兵民與賊拒者數月斬首五百餘尚書石璞復令建除餘孽建直抵賊巢察其情多良民被脅者悉諭以歸農得被擄男婦二千餘口以還就遷同知復以平寇功



食三品俸遷浙江僉事奸民有不逞者構詞以危建再被逮均獲直復任以老病致仕

謝琚字仲玉正統戊辰進士授御史以太監金英家人犯法下都御史治之不罪英琚坐不任風紀降吉安府推官尋擢南京兵科給事中數上疏論事剴切出為浙江參議抑中官黜墨守風節凜然年四十餘自陳歸里王鼎字器之父佐字廷用天順己卯舉人歷鄒平桐廬訓導善造就人士學者稱為三益先生鼎舉成化辛丑進士知上饒縣佐慮其年少時寓書訓飭之中貴人嘗取水晶陵轢郡縣至上饒獨陰戒其下曰毋觸令移知樂陵歲饑盜起民多流殍鼎悉為瘞之又舉救荒僱役法以收其壯者給牛種歸無業民四百餘戶時郡官猶督率逋賦鼎與約田之入半以輸公半以活家果輸如期徭役定戶九等為差部使者下其法於諸道考最擢御史出按蘇松諸郡薈剔夙蠹破除祕援丹徒瀕大江風濤齧田成洲鼎以洲蘆之利歸之田主糧以無負遷光祿少卿改大理寺少卿以忤劉瑾閩侯縣志 六七 列傳四下 七

謫知縣改寶慶府同知歷河南僉事入為順天府尹瑾誅遷都察院右副都御史掌院事進右都御史乞歸給月米輿隸賜玉帶異數也卒贈工部尚書

廖雲騰字時和父誠字伯純天順壬午舉人授温州府訓導遷永嘉禹城兩教諭雲騰第弘治庚戌進士官刑部郎中每自公歸輒閉門謝客戒家人無擅納書問初多忤久察其捐介無敢以私干者奉命按桂州有貴官被訐奏當就獄力求免雲騰執之堅或諷以自保之策曰吾行且謀歸安能曲法事貴人乎

馬森字孔養父聰字良夫晚得子家人抱之墜殞焉聰給其妻曰我誤也不之罪踰年而舉森嘉靖乙未成進士授戶部主事轉員外郎出知太平府民有兄弟訟者予鏡令照曰若二人老矣忍傷天性乎皆感泣謝去轉江西副使進按察使有進士嬖外婦而殺妻撫按欲緩其獄森卒抵之法歷左布政使就擢巡撫森久居江西多惠政時創三殿疏請南糧改折省



民財數萬金江西故行淮鹽三十九萬引後南安贛州吉安改行廣鹽既而私販盛行於是淮鹽僅行十六萬引數年間國用大絀森疏言其害請於峽江縣建橋設關扼閩廣要津盡復淮鹽額入爲刑部右侍郎改戶部初森在江西薦布政司宋淳淳後巡撫南贛以贓敗森坐調大理寺卿屢駁疑獄與刑部尚書鄭曉都御史周延稱三平病歸起南京工部右侍郎改戶部以右副都御史總督漕運兼巡撫鳳陽遷南京戶部尚書隆慶初改北部是時登極詔書蠲天下田租半太倉歲入不能副經費而京通二倉積貯無幾帝問內庫大倉錢糧之數森具對且言積貯天下大命也蓄無三年命曰非國今催徵急搜括窮矣陛下登極首詔止土木之工罷珍奇之貢損無益之費捐不急之官書曰慎乃儉德惟懷永圖惟陛下終行節儉而已帝不懌手詔責令措置森奏祖宗舊制河淮以南以四百萬供京師河淮以北以八百萬供邊一歲之入足供一歲之用後邊陲多事支費漸繁一變而有客兵之年例再變而有主兵之年例其初止三十五萬

閩侯縣志

六七

列傳四下

七

耳後漸增至百三十餘萬屯田十虧七八鹽法十折四五悉以年例補之在邊則士馬不多於昔在太倉則輸入不益於前而所費數倍以詔書蠲除故今日告匱視往歲有加願廣集眾思令廷臣各陳所見時舉邊才森言往者輔臣楊一清以南人用陝西尚書王驥以北人任雲南俱有聲績宜勿論南北資格斟酌推用務當其才詔皆如所請隆慶二年四月帝命中官崔敏發戶部銀六萬市黃金森持不可且言舊制御札皆下閣臣無司禮監徑傳者事乃止既又命購珠寶森亦力爭不聽三年以母老乞養歸後屢薦不起森爲考官時夏言壻出其門欲介之見言謝不往嚴嵩聞而悅之森亦不附爲徐階所重遂引用之其爲大理卿歸值閩卒兩倡亂森葛巾野服出諭之隨解散劉堯誨巡撫福建議復夫甲庫役法森備陳其害議遂寢繼撫閩者龐尙鵬欲行一條鞭法森力贊成之鄉人爲立報功祠萬曆八年卒贈太子少保諡恭敏子熒字用昭以蔭爲南京都督府都事熒字季聲萬曆閒貢生任武昌府興國州判官



林懋舉字直卿嘉靖甲辰成進士授鳳陽府推官有疑獄淹數十年懋舉至立剖之人呼爲青天入爲南京工科給事中二十九年八月俺答大舉入寇攻古北口劄鎮兵潰分掠畿甸州縣京師戒嚴懋舉條上五事曰振京營以固根本壯弱鎮以衛門庭推廣聖意以備緩急招降用閒以收人心傳報聲息以安人心尋再條上定卒伍重任使精簡拔詳節省重邊臣五事兵部尚書某欲從俺答請以牛羊易米豆懋舉疏劾之三十二年又疏言南京浦子口宜設戰船習水戰以備不虞會考察官吏又陳四事曰優異等嚴汰黜信禁令杜倖門所上章疏皆剴切中時弊帝多嘉納賜敕有摘伏發奸不怵於勢摠誠陳見有裨於時之語遷蘇州知府蘇州財賦甲天下懋舉禁奢靡懲豪猾省煩苛郡人便之會倭寇突犯松江掠太倉攻嘉定窟於金山柘林之境進逼都城勢張甚懋舉連戰卻之復遣兵襲擊覆之於鶯脰湖有黠酋自杭嚴西掠宣歙長驅至常州懋舉督軍至郡西橫塘一鼓殲之捷聞賜金幣時兵荒相繼縣官猶旦暮追求懋舉曰民閩侯縣志 六七 列傳四下

力竭矣奏蠲常賦十之七八吳人愛之如父母建祠祀焉擢廣東副使領巡海道三十六年大征扶溪大羅山諸峒懋舉率兵夜擣巢穴平之明年倭自漳泉入揭陽殘破海豐饒平諸邑惠潮騷然懋舉馳至潮州調集狼土兵用閒設奇破之於黃岡鎮賊宵遁官軍乘勢又破之海豐逋寇廖鎮鳩家僮數百將與倭連懋舉督鄉兵擒之絲羅蠻憑險恣睢執通判馮某挾爲質懋舉曰亟之且不測乃遣偵者直抵其砦諭以禍福諸酋懼遂歸馮絲羅蠻乃平雲和下萌遺孽煽亂勢方熾巡撫議討懋舉佐其謀率嶺東兵犄角擣穴得首馘九千有奇又明年進山東參政歲大饑不待請發廩穀三千餘石給之景藩就封道臨清濟寧扈從中貴人所過驛騷自令丞以下多被窘辱有致死者懋舉訴之王中貴人皆斂手避遷廣東按察使進右布政轉廣西左布政命下而疾作稍瘳聞廣西有劫庫之變戕及參政遂力疾討賊正法竟以赴任愆期爲言者所摘例當改調遂歸穆宗卽位撫按交薦旋以疾卒



陳奎字汝星嘉靖癸丑進士知丹陽縣創造城堞倭寇至民賴以全擢戶部郎出知真定府分別白蓮教首從縱釋數萬人轉廣東參政陞按察使時山寇巢壘碁布奎諭以大義皆感泣謝罪總督某將大戮潮州民以樹威奎力爭被毀調用遂歸值閩中饑奸民謀奪北庫兵器以逞奎夜為蠟書投巡撫許孚遠召兵守北庫奸民皆就禽家居三十八年卒弟鳴鶴字汝翔與徐燧徐勛謝肇淛為詩友子益祥字履吉亦有詩名

嚴用和嘉靖乙丑進士為兵科給事中疏言吏部尚書楊博今之耆舊自筮仕迄今數歷中外四十年民事邊情諳歷嫻練守正竭忠此大小臣工所共知也今以題覆差誤之閒即令致仕而去以時事多難而言則不可不留之展盡所長以人心公議而言則不可不留之以孚眾志伏願特旨留博俾圖後效詩論騷焉遷工科都給事中隆慶三年言東南災傷重大請罷南京蘇杭織造召太監還京工部尚書朱衡覆奏請如其言帝責衡沽名令對狀乃宥之

### 閩侯縣志

六七 列傳四下

三

林應訓字子啟隆慶辛未進士知南昌縣擢南京御史先是嘉靖中蘇松常鎮四郡洪水為患又河衝泗州幾陷陵寢至是廷臣推可使治水者命應訓應訓躬親胼胝于常州濬孟瀆于鎮江濬練湖於蘇州吳江濬長橋起龐山湖達吳家港於昆山濬橫塘起歸家墳小石橋至本塘於松江濬吳淞江大川六支流四十七港濱九十一作水利圩圖積五載而功成江南水患以息水利以廣遷南尚寶寺卿後奉旨建崇德報功坊於郡城西陳璧字道良萬曆丁丑進士授歸德府推官入為禮刑二科給事中劾都御史李材為執政所忌出知南直太平府時水旱疾疫交作璧捐俸賑錢米給醫藥活民數十萬死者予之構民穿土得黃白二金以獻璧悉以修城垣新學宮加意諸生每月再課士捐金購書籍治禮器百度俱修擢廣東按察司副使領提學道遷湖廣參政山東按察使所至風紀凜然在湖廣值奸人王首仁誣親藩在山東值惡璫陳增誣益都知縣眾皆觀望璧獨奮然持議不可奪尋以右布政銜備兵淮揚又與璫忤乞終養未幾卒